

Plaza Betico Croes y Plaza Padu Lampe mester bin cla prome cu 18 di Maart



ORANJESTAD - Den cuadro di 30 aña di Status Aparte y 40 aña di Himno y Bandera inversion grandi ta wordo haci pa bin cu un renobacion completo di Plaza Betico Croes.

Proximo dia ta wordo conmemora Dia di Betico, dia 25 di januari awor, pero mirando e reconstruccion riba e plaza aki minister di Cultura,

sr. Otmar Oduber lo sinta cu fundacion Betico Croes y famia di Betico Croes (q.e.p.d) pa intercambia di idea pa asina evalua, unda nan lo bay haci'e. Intencion lo ta pa haci un presentacion di e trabou di renobacion di e plasa cu ta carga e nomber di e gran estadista di nos pais. E plasa aki si mester bin cla e siman prome cu dia 18 di Maart venidero, esaki ta e

meta cu nan tin nan dilanti pa e celebracion cu ta tuma luga normalmente ariba e plasa lo tuma luga debidamente. Igualmente e Plaza Padu cu ta wordo construi patras di Oficina di Gobernacion cu un inversion di 1.6 miyon florin lo mester ta cla pa e mesun fecha di nos Dia Nacional di Himno y Bandera.

Pa casi 30 aña, Plaza Betico Croes cu ta testigo mudo di cantidad

di acontecimiento celebra riba dje, no a conoce un mantenimiento debido, ya cu su condicion ta hopi malo y e no ta safe mas.

E intencion ta pa renoba Plaza Betico Croes completamente cambia full e koepel y haci'e acustico y drecha e cuarternan, instala ekipo di zonido, iluminacion, bankinan.

Ademas lo construi bañonan



pues no mester di baño portatil mas. E tipo di inversion aki lo permiti pa mas bandanan musical lo por haci mas uzo di dje.

E mandatario a papia di un inversion di casi 1.4 miyon florin. E tin cu gradici Oficina di Turismo (ATA), Tourism Product Enhancement Fonds (TPEF), y tambe FDA, ya cu ta e tres fondonan cu traves di UNOCA a contribui pa

e proyecto di renobacion di plaza Betico Croes lo ta un realidad. Pero tambe tin placa di presupuesto di gobierno hinca den e proyecto aki. E compania Better Infrastructure Company (BIC N.V) a gana e destaho publico pa e parti pafu di e plasa y e compania Geerman Constrution a gana e bid di henter e koepel, parti di coriente y renoba full e parti abou di e plasa. □